

Surselva e Val Blenio s'entaupan

El rom dallas stentas dalla Pro Lucmagn d'avischinar socialmein la Val Blenio e la Surselva, ei vegniu organisau sil hospezi ina sentupada da scolaras e scolars d'Acquarossa e Mustér. Denter auter han las duas classas dils scalems superiors giu la caschun da mirar egl intern dil mir da fermada dallas Ovras electricas Reinanteriur SA.

Hans Huonder/FMR

Ils statuts dalla Pro Lucmagn ch'ei vegnida fundada avon biebein 20 onns prescrivan denter auter ch'ei seigi da sestentar da promover il brat cultural dalla populaziun dalla Surselva e la Val Blenio. All'entschatta dil temps ch'il pass ei vegnius aviarts permanentamein era duront igl unviern, ei quei succediu cun differents arranschaments da mintga vart da S. Maria. Plirs onns ei lu marschau nuot, uss ein quellas stentas puspei vegnidas reprimas. Dacuort ha giu liug in concert classic a Mustér, respectivamein a Leontica culla finamira d'ina avischinaziun. Il mardis ei in secund project el rom da quellas stentas suandaus.

In di communabel

32 scolaras e scolars dils scalems superiors da Mustér ed Acquarossa ein sescuntraì communablamein sil hospezi culs dus menaders da scola *Roger Tuor* e *Stefano Imelli* ed ils magisters *Aluis Hosang*, *Adrian Pally* ed *Elias Valerio*. La finamira: guder in di d'informaziun communabel. Las duas classas ein vegnidas orientadas davart il lag da fermada a S. Maria entras *Pia Candinas* e *Luregn Caspescha* dall'Axpo Hydro Surselva SA. La part segiramein la pli interessanta da quell'informaziun ei la viseta egl intern dil mir da fermada stada. Lag e mir ein in implont dallas Ovras electricas Reinanteriur SA. Suentar la spassegiada entuorn il lag ed il gentar communabel ei suandau ina secunda part d'informaziun dil di. Sclaras e scolars dil scalem superiur d'Acquarossa han presentau fotografias da 20 objects dalla Val Blenio. Nums e cavazzins talians ein allura vegni translatai en tudestg e romontsch. Aschia han las scolaras ed ils scolars era empriu d'enconuscher empau ils lungatgs indigens dad omisduas varts dil Lucmagn.